



Tusagassiuutinut Nalunaarut / Pressemeddelelse

Ukioq 2017 pisoqarfiulluartaasaq aallartippoq.

Ukiortaami pilluaritsi. Sinerissami Atassut-mi ilaasortat, tapersersuisut, ataqqinaammi ilaasortat, qinikkat, suleqatit, tamassilu kalaallit nunaanni inuiaqativut tamassi ukiortaami pilluaritsi, qanortoq ukioq nutaaq aallartitarput tamassinnut iluanaarnermik, peqqinnermillu atugaqarfiuli.

Ukioq 2017 neriulluarfigissavarput. Inuiaqatigiinni kiffartuussisutut, akisussaassuseqartumillu nunatta aqunneqarnissaa sapinngisarput tamaat peqataaffigissavarput. Nunatta ineriartornerani piffissaq pingaaruteqartoq, soqutiginarlorlu tikeqqavarput. Allangulerfik ineriartornermi nalaateqqavarput. Tamanna aamma isumaqarpoq, inuiaqatigiinni akuuneq, oqartussaaqataanerlu tamatigut erialugulu aallutissagipput, kikkut tamat ilusilersuinermi peqataatinnissaat, oqartussaaqataasutullu misigisimajuarnissaat qularnaassallugu.

Atassut aallartikkamili akisussaassuseqartumik politikkeqarneq tunaarivaa. Inuk qitiutillugu. Kiffaangissuseqarneq, kalaaleq kinaluunniit nunamini kiffaangissuseqarnerulluni inuussasooq anguniarlugu. Kiffaangissuseq aneq, isumaqarpoq aamma, akisussaaffik aneq. Taakku ataqatigiipput. Atassut-mit pingaartinneqartuarput, inuiaqatigiit assigiinnik atugaqartissallugit periarfissaqartitsineq, aammalu tamat tamaasa isigalugit ilusilersuinissaq.

Kinaluunniit kalaallit nunaannut uummateqartoq tikilluaqqusaassaaq, nunamullu kiffartorusuttoq periarfissinneqarluni. Innuttaasut ulluinnarni periarfissaat aallaavigalugit inerisarneqassapput, atukkat oqilisartuarnissaat salliussaaq. Aammalu inuussutissarsiorneq, ilinniartitaaneq, allatigullu inuttut ineriartornissamut aqquiti eqaallisarnerat suli pitsaanerulernissaat sulissutigeqqissaaq. Inuussutissarsiutit nutaat pilersiorternissaanut periarfissat eqaallisaqqinnissaat, sumiiffinnilu periarfissat oqilisarnissaat suliassaavoq.

Meeqqat angerlarsimaffiup avataanut inissinneqartartut amerlavallaarput. Angajoqqaat ikorfartortariallit taakkuupput isumagisassat. Sapinngisamik periarfissaq kingulliusaaq, meeqqap angerlarsimaffiup avataanut inissinnissaa. Sallertut angajoqqaat isumagineqarnerat, katsorsaanikkut, ilinniaqqinnikkut, siunnersorneqarikkut allatigullu salliussapput. Atassut-miit nuannaarutigaarput piffissami kingullermi, inunnik isumaginninnikkut sullissisut akissaatitigut malunnaatilimmik pitsanngorsaavigineqarmata, tamannami pisariaqarluinnarpoq, suliassat unamminartut taama annertutigitillugit pisariaqarmat.

Inuusuttut meeqqat atuarfiat naammassereernerani, ilinniartinnut ingerlariaqqittanngitsut suli amerlavallaarujussuarput, inuiaqatigiit tamatta akisussaaffigaarput, inuusuttatta meerartattalu ilinniagaqarnissaat, aammalu ingerlariaqqiffiusinnaasut qularnaassallugit. Taamattumik periarfissat, siunnersuineq, malinnaatitsinerlu suli eqaallisartariaqarpoq.



Angajoqqaat pisariaqartitsisut siunnersorneqartarnerat sumiiffiit ilaannaanni pisartooq tamakkiisunngortariaqarpoq. Ilinniartut sungiusarlutik suliffissaannik amigaateqarneq annertoorujussuuvoq. Ajuusaarnarpoq, inuusuttavut ilinniaqqullugillu, suliffimmik sungiusarfissaannik tamatigut tunisinnaaneq ajoratsigit. Tamanna allannngortilluinnartariaqarpoq. Suliffiit sungiusarfiusinnaasut periarfissaat annertusisariaqarpoq. Suliffeqarfiit pingaartilluinnartariaqarpaat siunissami sulisussaminnik ilinniartitsineq, pisortat ilinniartoqarfiit, suliffeqarfillu tassani suleqatigiilluinnartariaqarput.

Ineqarnikkut siuarsaaneq, inuusuttut inissiaat, namminnerlu illuliorniartut periarfissaat eqqaallisarneqartoq tamakkiisumik iluatsittariaqarpoq. Atassut-miit nuannaarutigisatsinnik, ineqarnikkut nalunaarusiorneq, ukiorpassuarni amigaatigineqartoq naammassigaluttuarpoq, tamannalu siunissami qaninnermi nunatta pisariaqartippaa, iluaqutigissallugulu. Taamaattoq suli sumiiffippassuarni, pingaartumik nunaqarfinni illuliornerit, innissialiornerit pisariaqarput. Sanaartornikkut siamasissumik aaqqissuussineq attanneqartariaqarpoq, siamasissumik sulinerup pitsaasumik malunniuteqarnera noqiinnartariaqarpoq.

Aalisarnikkut pitsaasumik siuariartorneq suli annerulersinnaavoq. Tunitsiviit, aammalu tunitsiviliorusuttut periarfissaat eqqaallisartariaqarput, suliffinnik ataavartunik pilersitsinissaat pisariaqartipparput, avammullu tunisassiorneq suli siuarsaqqittariaqarpoq. Nunarsuarmioqataanermi niuernikkut sakkortoorujussuarmik unammeqataavugut, tamannalu aamma pitsaasuinnarnik kinguneqarneq ajorpoq, taamaattumik sillimmartaartuarneq sungiutassaavoq. Tunisassiorlutit eqaatsumik, sukkasuumillu tunisassiorneq, pitsaassutsillu qaffasittuarnissaa piunasaammat, tamanna nunatsinnut piunasaavoq annertoq, paarisariaqartorlu.

Ukioq manna aamma kommuuninut, nunaqarfiit siulersuisuinut, ilagiillu sinniisaannut qinersisussaavugut. Atassut-mi kommuunit aqutsinerat pingaaruteqarluinnartutut isigaarput. Inuit qanimut tikillugit aqutsineq, peqataatitsinerlu tassaniippoq. Kommuunit oqaluttuarisaaneranni pingaaruteqartoq, annertoorlu aamma ukioq manna pissaaq. Tassalu Qaasutsup Kommuunia marlunnik avillugu aaqqissuussineq nutaaq pissammat.

Ukioq mannaluk ikaarsaariarnermut ataatsimiititaliat marluk qinersiviussapput. Qinersinermilu aamma Qaasutsup Kommuunia naggataamik qinersiviussaaq, atorunnaartussaammat, aappaagulu 2018-mi kommuunit nutaat marluk pilissammata. Atassut-miit siuttuuffigivarput, Qaasutsup Kommuuniata avinneqarnissaa. Anguniakkamilu innuttaasorpasuit suleqataasimanerannik qutsavigaavut. Qanortoq kommuunit nutaassat marluk, innuttaasunut malunnaatilimmik kiffartuussilluartut, qanimut peqataatitsisut, aammalu aaqqissuussineq innuttaasunut naleqquttoq taakkununga atuukkili. ukialerpat partii ataatsimeersuassaaq.

Kingullermik 2014-mi ileqquusumik ataatsimeersuarneq pivoq. Maannalu ukiamut ileqquusumik ataatsimeersuarneq ingerlatissavarput. Partii nutartertuarsimavoq, aammalu kinguariit nikittarneri ersarittarsimapput. Ukioq mannaluk aamma neriulluarpugut nutaaliorneq aallaavigalugu



ataatsimeersuarneq inerneqarumaartoq, pitsaasumik isumannaatsumillu ingerlariaqqinneq aqutissiuunneqarluni.

Partii akisussaassusilittut ukioq manna sulinerput nangissavarput. Innuttaasut peqatigalugit, tusarniartarlugit, aamma suleqatigalugit. Qujanaq ukiumut qaangiuttumut, ukioq nutaaq neriulluarfigalugu, tamassi ukiortaami pilluaritsi.

Qujanaq.

Knud Kristiansen

Siulittaasoq